

# RIFLESSIONS SUL PREDI

(San Lurinç di Sedean, pal 25m di pre Erminio Cossaro)

A son tanc' che a fevelin dal predi, ce in ben ce in mâl. Magari par esperience personâl. Se un al à vude une esperience positive, al è quartât a dî dai predis dut il ben di chest mont. Ancje se no jè purtrop cussì. Se un al à vude une esperience negative, al è quartât a dî duc' i mâi pussibii. Ancje se no jè vere. Par chel, come in dutis lis robis, si à di sintî no dome ce che un al dîs, ma si à ancje di cirî il parcè che un al fevele cussì.

Dal predi si spietisi tantis robis ancje contradditoriis. Ancje culî a secont de situazion personâl di ognun. Un vecjo e un malât a volaressin che la sô plui grande ativitât e fos chê di lâ pes cjasis a confuartâ chei che a patissin. Une esigence legjitime e sante. Se un al à fis, j plasares che il predi al stes simpri daprûf dai fruz e dai zovins. Ancje cheste e jè une esigence sante e legjitime. And'è di chei che a volaressin che il predi al fos simpri in glesie o impegnât in robis di religjon, lassantstâ dut ce che al riguarde la vite sociâl, culturâl, pulitiche de int. Âtris invessit, cun resons no mancual fuartis, a disin che il predi nol pò predicjâ il vanseli in astrat se nol cognos la int in duc' i aspiets de sô vite, senò al riscje di fevelâ par ajar. Difât fint a pôs agns fa i predis a fasevin ancje campagne eletorâl e cualchidun al à rivât adiriture a fâ lis listis dal consei comunâl.

Esigjencis complessis di une figure complesse te complessitât dai problemis e dai timps. Stant però che il predi al è soledut l'omp de religjon (la fede e jè une robe plui personâl e e jè un regâl di Diu), salacôr al è plui just e serio lâ a viodi ce che il libri di test dai cristians, la Bibie, al dîs dal predi. Un dai pas plui impuartanz al è l'inissi dal cjap. 5 de letare ai ebreos, là che l'autôr, che nol è san Pauli, al fevele dal sacerdozi di Crist, unic predi.

*“Ogni predi, cjapât sù dal mac dai omps, al è metût pal ben dai omptes robis che a riguardin Diu, par ufrî regâi e sacrificis pai pecjâz. Cussì al è in stât di vê dûl di chei ch'a son te ignorance e fûr di strade, stant che ancje lui al è vuluçât di pecjs; e propit par chel al scuen ufrî ancje par so cont sacrificis pai pecjâz, come ch'al fâs pal popul. Nissun nol po' cjapâsi chest onôr: dome chel ch'al è clamât di Diu, come Aron”) Eb 5, 1-4).*

Bisugne partî di chi e restâ in chest agâr.

## I

Prin di dut il predi al è cjapât sù dal mac dai omps. Nol è un agnul, ancje se al vares di jessi e tindi a diventâlu. Nol è un sant, ancje se al vares di jessi e tindi a diventâlu. Se al è un omp, e Diu al à lis sôs resons a vê sielzude cheste strade, che e jè la plui naturâl, si à di spietâsi ch'al veti i siei difiez e pecjs ancjemò prime ch'al meti pît in paîs. Parâtri no dome al scuen jessi cussì ma al è ancje miôr par duc'. Se al rivas un omp perfet, ametût ch'al esisti, varessial la stesse comprension pes miseriis de int? Un che nol sbalgje, ametût ch'al esisti, àjal tante passience e comprension par chei che, come duc', a passin di une falope in cheâtre?

O crôt che si veti di fâ, fra predi e int, il stes discors che si fâs, fra omp e femine. Parceche ancje il predi in cualchi maniere al è sposât. Un predi vedran, rabiôs, salvadi, al è une disgracie in tun paîs. Cuanche doi si sielgin par sposâsi, a cirin un tal âtri lis cualitâz che plui si cumbinin fra di lôr, ma a metin za in cont di volêsi ben ancje cui difiez, acetansi, sopuartansi, judansi un cu l'âtri a

coregisi. Parceche l'amôr al è prin di dut e so redut passience. Une femine no j disarà mai al so omp: "La prime che tu mi fâs, ti pari vie!". Se no rive a cussiderâ la femine (e l'omp di cheâtre bande), cui àjal di fâlu? Il cumun? Une mari no spiete di viodi in muse il so frut par decidi di volêj ben e di perdonâj ancje cuanche le fâs tribulâ.

Il rapuart just fra predi e int al è duncje chel dal amôr. Un amôr che al puarte e al sopuarte, come che nus al spiege cussì ben san Pauli tal cjap. 13 de prime letare a chei di Corint (*leilu!*).

Une comunitât che no rive a acetâ i limiz dal so predi (limiz di salût, di inteligence, di caratar, di etât, di cualitâz) no jè nè inteligjente nè tolerante nè cristiane. No si po' odeâ un predi parceche al à sbalgjât (o si pense che al veti sbalgjât) une volte. Dulà ese la caritât, la comprehension, il perdon?

Naturalmentri la predicje e vâl ancje e so redut pal plevan. Un predi che al è intolerant, prepotent, cence comprehension, che al viôt in te sô int dome pecjs, che al vierç la bocje in predicje o cun cheâtris predis dome par dî mâl de sô int, nol è cristian (ancje se al fâs tre messis in dî), nè inteligjent (ancje se si sente in catedre come un mestri), parceche no si cjale mai tal spieli de sô anime. L'unic che al podares rabiâsi o jessi sevêr cu la int al sares Gjesù Crist, che al è il vêr predi e nol à pecjât, ma lui al preferis perdonâ e dâ la vite pe salvece dai omps, tacant dai plui puars e pecjadôrs.

Chest rapuart fra predi e int al presupon la cognossince il plui pussibil direte e profonde e chest al presupon come condizion che il predi al resti in tune comunitât plui ch'al po' e fin che al rive a dâ e a cjapâ. La gnove leç de glesie, che un predi al à di stâ in tun paîs nûf agns, e jè juste il contrari. Al sares come dîur a doi maridâz: "Cumò che o veis tacât a cognossisi e stâ ben insieme al è il câs che si divideis".

Dongje de continuitât pastorâl, chest rapuart al presupon un numar di personis resonevul. No si po' vê vinc' mil abitanz e inludisi di cognossiju duc'. Cussì no si po' vê tre-cuatri paîs, cun tun predi che al côr come il mat di Puçûi, cence nè il timp di fermâsi un credo cu la int nè di fermâsi a rifleti, a pensâ, a preâ. Ancje culî la mode de glesie e va juste de bande contrarie. No dome dal vanseli dal bon Pastôr, che al cognos lis sôs pioris, ma ancje dal sintiment.

## II

Il predi al è cjapât sù dal mac dai omps no par scjampâ dai omps, ma pal lôr ben. Al è duncje, o al vares di jessi, un regâl di Diu. Se un predi al è sintût come un cjastic, al è fûr di strade.

Ma il "ben" dai omps al à plui musis e dimensions, pal fat che l'omp al è diferenziât e al à plui esigjencis. Al esist un ben de inteligence come la culture, il ben economic, il ben de salût, il ben psicologic, il ben ambientâl, il ben pulitic. Si sa che l'omp al è unitât e al sta ben cuanche al sta ben te sô totalitât, ma al è just che ognun al proviodi al so specific setôr. Chel dal predi al è il setôr religjôs. Difat la letare e dîs: "*Tes robis che a riguardin Diu*". Alore il predi al varà di cognossi la int in duc' i aspiez de sô vite, ma al à di rivâ al so specific: la religjon.

Il predi nol è metût par fâ pulitiche, par fâ il comerciant, par menâ atôr la int cu la coriere, par fâ praticis di pension o di judiç conciliadôr in tes barufis. Al è stât un timp che il predi al faseve di mestri, di miedi, di nodâr, al veve in man il paîs e al saveve duc' i peçoz de int. Chest al varà scignût fâlu in chês volte come suplence, ma nol è il compit primarûl dal predi.

Il prin compit dal predi, il so specific, al è di proviodi al ben spirituâl de sô int, a chês che une volte si diseve "la salvece da l'anime". Il predi al è l'omp de messe, dai sacramenz, de predicazion, de dutrine. Al è l'omp che al à di fevelâj 'e

sô int di Diu e a Diu de sô int. Come cjalant un miedi mi ven tal cjâf la salût e cjalant un mestri mi ven tal cjâf la culture, cussì cjalant un predi al à di vignimi tal cjâf il Signôr.

Tal secul passât, in France, al viveve in tun paisut un predi, passât 'e storie come il curât di Ars. Nol ere nè studiât nè oratôr. Epûr a levin di lui dute la France, siôrs e puars, vescu e fedêi. A tornavin a cjase cence tantis scuvieris, o ideis gnovis. Però sun tun pont a erin d'acordo: "O vin viodût Diu in tun omp".

Chest al è il predi: la memorie, il reclam, la inmagjne di Diu. Un Diu che lu palese no dome tes predicjs, che si po' ancje copiâlis o contâ chê dal ors, ma in te predicje insostituibil che e jè la sô vite. Si sa che nol è sant, ma al à di metile dute par diventâlu. Si sa che ancje lui al sbalgje, ma al à di metile dute tal cirî di no sbalgjâ o almancul tal imparâ dai sbalgjos la umiltât e la comprension.

Il predi al à di fevelâ ancje di Diu, ma al à di fâlu cul cjâf bas e cun tant riguart. Il predi nol à viodût il Signôr e duncje ancje par lui Diu al reste misteri, come par duc'. Un predi masse sigûr su Diu al riscje di dî monadis, di diventâ arrogant o, piês in mò, di confondi lis sôs ideis cun chês di Diu e lis sôs causis e batais come causis e batais di Diu.

Riguart a Diu, al è il predi che al à dibisubgne di Diu e no il contrari. Par chel il predi al è clamât "ministri di Diu". Che nol ûl dî "paron" di Diu e dai siei segrez, ma "servidôr", che al po' jessi licenseât ogni moment e soledut al à di rispuindi dal so lavôr. Lis animis a son di Diu e no dal plevan. Al è vêr che "*nissun nol po' cjapâsi chest onôr*", ma no baste la clamade. E covente la rispueste, une rispueste che e à di durâ duta la vite. Ancje Gjude al ere stât clamât, ma nol à rispuindût te maniere juste.

\* \* \*

A conclusion di chestis riflessions su la presince e su la funzion dal predi, soledut di chel che al à la cure spirituâl di une comunitât come il plevan, si à di ringrassiâ il Signôr par vê sielzût omps par judâ âtris omps a salvâsi. Si à di domandâ pe comunitât il don de comprension fra predi e int, come in ogni famee che e à la fonde sul amôr e sul perdon. Si à di preâ che il predi al puedi jessi une inmagjne trasparint e lusorose di Diu, di mût che la int, viodinlu, e vegni invoade a pensâ a Diu e no al gjaul. Si à di domandâ, pal predi, umiltât, sapience e perseverance fin tal ultin. San Pauli al à une espression fuarte e tremende: "*Che no mi sucedi che, dopo di vô predicjât a di cheâtris, o seti scualificât propit jo*" (1 Cor 9, 27).

Prein che come ogni famee e à dirit di vê un pari e une mari come che Diu comande, cussì nissun paîs nol vegni cjastiât cun tun predi salvadi e prepotent o restant cence une guide e une presince impuartante come il predi. E se il Spirt al bat âtris stradis par tirâ fûr siei servidôrs sielginju magari dal paîs e cun tant di responsabilitât e di impegn di famee, domandin la gracie e il sintiment di no vê pore de novitât. In font al è just che ogni stagjon de storie dai omps e veti lis rosis e lis pomis adeguadis.

Visepente, ai 7 di avost dal 1995

pre Antoni Beline